



Inatsisartunut ilaasortaq  
Andreas Uldum  
Demokraatit

## **Naqinnernik ilisarinnissinnaangitsut pillugit § 37 naapertorlugu apeqquummut nr. 2011-44-mut akissut**

Atuartut allanniarnermik atuarniarnermillu ajornakusoortitsisut pillugit apeqqtinnut Naalakkersuisut qujapput.

### **Aallaqqaasiut**

Ilisimatusarnerni tamani paasinarsisarpoq atuartut ukiuni siullerni atuarfimmiinnerminni "paasinnilertussaasut". Tassa imaappoq atuartut 2. klassernermik ingerlanerani atuarnermik aallartitsissasut. Taamaattumik kommunimi atuarfik atuartunut TAMANUT 2. klassip ingerlanerani atuarnermik ilinniartitsinissamut suliniuteqassapput. Atuartut atuarnermik ilinnialinggippata atuartut ilinniartitsisullu atuartunut ilikkarniarnerminnik iluatsitsinngitsoortunut immikkorluinnaq suliniuteqassapput. Sulinermi tassani atuarfimi suliniarneq, tassunga ilanngullugu immikkut atuartitsinermut/aallarterlaanut atuartitsinermut ataqatigiissaarisooq atuarfiullu inspektøria tassaapput qitiusumik pingaarutilimmillu inissisimasut.

Tamatuma saniatigut atuarfimi ukiut affakkuutaarlugit atuartut atuarsinnaanermik misilinnerisigut atuarsinnaanikkut inissisimanerannik misissuisoqartariaqarpoq. Atuartut 2., 3., 4. aamma 5. klassetrinimi atuarsinnaassusiat novembarimi maajimilu misissuiffiqeqartarpoq tassanilu angusat klassimi atuartitseqqinnissamut tunuliaqutaassapput.

Immikkut/ aallarterlaanullu atuartitsinermut ilinniartitsisoq ataqatigiissaarisuusooq sulinermik isumaginnittuusinnaavoq. Pineqartoq kalaallisut ilinniartitsisunik suleqateqarluni misilitsitsinnaavoq taamatullu aamma ilinniartitsisut suleqatigalugit misilitsitsinernik iluarsaasinnaalluni naggataatigullu angusat tunuliaqutaralugit ilinniartitsisunut ilitsersuisinnaalluni atuartitsinerup qanoq iluarsineqarsinnaaneranik, atuartut tamarnik atuarniarnekkut ineriartoqqissinnaaqqullugit. PPR siunnersuinikkut ilitsersuinikkullu peqataasinnaavoq.

Angusani paasinarsikkajuttarpoq atuartut ilaat atuartitsinermik naatsorsuutigisatut pissarsiaqarneq ajortut. Atuartunut taakkununga immikkorluinnaq atuartitsinissaq aqqissuunneqassaaq atuarniarnekkut ineriartornerminnik aallartitsisinnaaqqullugit ingerlaqqissinnaaqqullugilluunniit.

Atuartut ataasiakkaat immikkut holdikkuutaarlugilluunniit atuartinneqarnerannut atuarfimi nukippassuit atorneqartarput. Atuartut klassitavimmiitinnagit atuartinneqartarput klassitavilli fagimi pineqartumi atuartinneqartarluni. Atuartut fagini

28. feb 2011  
Sagsnr. 2011-044291  
Dok. Nr. 573576

Postboks 1029  
3900 Nuuk  
Tlf: +299 34 50 00  
Fax: +299 32 20 73  
Email: kiin@nanoq.gl  
www.nanoq.gl

ajornakusoortitaminni sap.akunnerannut tiimialunnguani atuarteqqinneqartarput, ass. sap.ak. 2, 3 imaluunniit 4 tiimini. Aaqqissuussinerli taanna PPR-Avannaani atuarfimmi tarnip pissusiinik ilisimasalittut aqutsisuusimasumit kissaatigineqartutut angusaqarfiunngitsutut naliliiffigineqarpoq.

Kaammattuut: Atuartut fagini (kalaallisut/matematik) ajornakusoortitaqaraangata piffissami sivikinnerusumi tiimerpassuarni sukumiisumik pikkorissarneqarlutik atuartinneqartassapput. Ass. sap.ak. qulini sap.ak. 10 tiimini atuartitsisoqartassaaq. Pimoorussilluni aallussillunilu atuartitsineq atuartumut angusaqarfiusarpoq. Atuartitsineq 3. imaluunniit 4. klassimi pikkorissarnertut pisarsinnaavoq.

Atuartut atuarniarnermik allanniarnermillu ajornakusoortitaqartut eqimattat marluupput:

Inuusuttut **atuarniarnermik allanniarnermillu ajornakusoortitaqartut** pineqarnersut imaluunniit inuusuttut **naqinnernik ilisarinnissinnaangitsut pineqarnersut** assigiinngissuteqartorujussuuvoq:

- Inuusuttut atuarniarnermik allanniarnermillu ajornakusoortitaqartut tassaapput inuit atuarfiup kingorna ilinniaqqinnissamut pisinnaangorlutik atuarnermik allannermillu ilikkarsimangitsut.
- Meeqqat inuusuttullu naqinnernik ilisarinnissinnaangitsut ikittunnguupput. Atuararnermik allanniarnermillu ima *ilungersunartigisunik* ajornakusoortitaqarput ajornakusoortitaqartuartsanngorlutik. Innarluutiminnut taarsiissuteqarfigneqarnissamut periarfissinneqassapput.

Inuit inuusuttut atuarniarnermik allanniarnermillu piginnaasakillutik atuarunnaaraangata pissutaasut arlaqarsinnaasarput:

1. Atuartitsineq (atuartitsineq atuartup pisariaqartitaanut sammitinneqarsimangitsaq)
2. Atuartoq (atuartoq arriitsumik ilikkariartortoq, atuartoq malinnaasinnaangilaq atuartorlu pisariaqartitamini atugassaqartitaanani).

Atuartut ineriartornissaat atuarfiup aamma ilinniartitsisut akisussaaffigaat. Ilinniartitsisoq 1) atuartitsineq pillugu ilisimasaqartussaavoq, taamatullu aamma 2) atuartut atuarsinnaanermut piginnaasaannik ilisimasaqartussaalluni, aamma 3) ilikkariartornertaa pillugu ilisimasaqartussaalluni.

1a-mut. Atuartut atuarniarnernannut allanniarnernannullu iliuuseqarnissamut atuarfik sivisuallaamik utaqqisinnaavoq. Ilinniartitsisut ima eqqarsarsinnaapput "atuartut atuarnermik ilikkassaqaartut", "atuartut piffissaqartilaaginnaraanni atuarsinnaangussasut". Ilinniartitsisut neriutigisarpaat atuartut ilikkariartulissaqaartut. PPR-imiilli misilittagarineqarpoq taamaattoqanngitsaq! Atuarfimmi 7., 8. aamma 9. klassini atuartoqakkajuppallaartarpoq klassimi "toqqorsimasunik". Ilinniartitsisut atuartut atuarnernanni isumaqartarsimapput atuartumut ajuusaarnartoq, atuartullu unitsiinnarlugit piumasaqarfinginnerusarlugit. Tamanna tamani tamaani atugaavoq, illoqarfiilli annerit qimakkariartortillugit suli atugaanerusarpoq. Atuartut angajullernut klassiniitillutik taamaattarput atuarfimmiilluunniit klassinut allanut allatut atuartitsiviusumut inissinneqarlutik. Ilinniartitsisut atuartullu tunniutiinnartarput.

1b-mut. Ilinniartitsisut atuartitsisarput ilinniartitsisorpassuilli pitsaasumik ilinniartitsinissamut naammattumik pisinnaasaqarneq ajorput. Atuartunik tamanik pineqartumi ataatsimi – piffissami tassani peruserlu taanna atorlugu atuartitsisarput. Tamatuma kinguneraa atuartitsinerup atuartut ilaannannguinit naleqquttuusarnera, atuartut sinneri pissarsiaqassanatik. Ilinniartitsisut ilisimasaqarnerullutillu ilinniarsimanerussapput.

1c-mut. Ilinniartitsisut atuartitsinissamut najoqqutassatik inussiatullusooq uninnatik malittuarpaat suliamik naliliissanatik. Ilinniartitsisut malinnaasinnaasariaqarput najoqqutamilu "allassimasut" tunuliaqutaralugit ingerlatitseqqissinnaasussaallutik. Ilinniartitsisut ilinniarnissamik ilinniaqqinnissamillu amigaaqarput.

1d-mut. Atuarfimmi atuartut ilaatigut assiliilluni allatsinneqarlutik suli piffissaajarneqartaqaat. Ilinniartitsisulli tamanna pisussatut isigaat. Suup iluaqutaanera pillugu ilinniartitsisut ilisimasaqassapput – pitsaaneruseqarput ilinniartinneqassapput.

2a-mut. Atuartut assigiimmik ineriartorneq ajorput. Atuartut assigiinngitsumik assigiinngitsumillu sukkassusilimmik ilikkariartortarput. Tamanna tunuliaqutaralugu ilinniartitsisut atuartitsinissamik aalajangiissapput. Ilinniartitsisut atuartut ajornakusoortitaqartut ilamissulli siuariartunngitsut sammisariaqarpaat.

### **Apeqput 1. Meeqqat atuarianni atuarnermi aamma allannermi sanngiitsut inuusuttut ikiorserniarlugit tigussaasumik qanoq suliniuteqartoqarpa??**

#### **Akissut:**

Atuarfippassuarni holdilersuisoqartarpoq (immikkut atuartitsineq) atuartunik atuarniarnikkut allanniarnikkullu (aamma matematikimi) sanngiitsunik atuartitsinissamik suliassaqarfiusunik. Fagimi ilinniartitsisoq atuartumik atuartitsinermut tassunga sap.ak. tiimialunni klassip avataani pisartumut innersuussisuusarpoq.

### **Apeqput 1b. Naalackersuisut tamatumunnga atatillugu qinnuigaakka nalilersoqqullugu, atuariup inissisimaneq apeqqutaatillugu assigiinngitsumik suliniuteqartoqartarnersoq. Naalackersuisut nalilerpassuk, assigiinngitsoqartoq, taava Naalackersuisut qinnuigissavakka nassuiaqqullugu, assigiinngitsumik periuseqarneq qanoq iliorluni assigiissarniarneqarnersoq?**

#### **Akissut:**

Illoqarfinni nunaqarfinnilu atuarfinni suliniutigineqarsinnaasut assigiinngillat. Atuarfinni assigiinngitsuni ilinniartitsisut ilinniarsimanerat assigiinngimmat aamma ilinniartitsisut atuartitsinissamut periarfissaat assigiinngillat. Assigiinngissut tamanna ilinniartitsisut atuarniarnermik ilinniartitsisuusut tamarmik ilinniartitsisut ilinniarsimasuutinnerisigut assigiissaarneqarsinnaavoq. Tamatuma saniatigut atuarfinni tamani ilinniartitsisut ikinnerpaamik ataaseq (atuarfinni angisuuni ilinniartitsisut amerlanerusut) atuarniarnermut tunngasuni immikkut ilinniaqqissimasuusariaqarput. Ilinniartitsisoq atuarniarnermi ilitsersuisuusinnaavoq atuarnermillu immikkut ilinniarsimasuulluni.

### **Apeqput 2. Naalackersuisut pilersaaruteqarpat meeqqat atuarianni atuartut naqinnernik ilisarinnissinnaanngitsut misilinneqartalernissaannut taamaaliornikkut ajornartorsiut siusissumik sumiissusersiniarlugu?**



**Akissut:**

Atuartut tamarmik 1. klassimi atualernerannit aaqqissuussaasumik anguniagaqarfiusumillu atuartinneqartarnissaat pineqarpoq. Atuartut 1. klassimiilli ineriartornerat ilinniartitsisunit malinnaaffigineqassaaq. Ilinniartitsisut atuartunik allatulli ineriartunngitsunik samminnissapput. Atuartut sanngiitsut sapinngisamik piaartumik anguniagaqarfiusumik atuartinneqassapput. Atuartitsineq klassimi pissaaq.

Atuartut naqinnernik ilisarinnissinnaannginnersut (siullermik) misissussallugu iluaqutaanngilaq. Nunani allani ilisimatusarnernit ilisimaneqarpoq innuttaasut ikittuaraannanguit naqinnernik ilisarinnissinnaanngitsuusut.

**Apeqqut 3. Atuartut atuarnermut allannermullu sanngiitsut qulingiluat efterskolimi inissaqartikkumaarlugit Naalakkersuisut aalajangernerata saniatigut, Naalakkersuisut qanoq pilersaaruteqarpat meeqqat inuusuttullu pineqartut ikiorserniarlugit ? Akineqarusunngilara martsimi ataatsimeersuaatigiinneqassamaartoq, ataatsimeersuarnermi tassani inersimasut pineqartussaammata?**

**Akissut:**

Demokraatinit uparuarneqartutut højskolini Piareersarfinnilu atuarnermik atuartitsinissamut periarfissaqarluarpoq. Tamatumanili atuarniarnermik ATUARTITSISOQARNISSAA pisariaqarpoq. Ilinniartitsisumik atuarnermik immikkut ilisimasalimmik atuartitsisoqartariaqarpoq. Tamanna aqutugalugu inuusuttorpassuit inersimasorpassuillu atuarunnaareersimasut atuartinneqarnissaat periarfissaalluarsinnaavoq. Suliassaq imaannaanngilaq, tassami inuusuttut atuarfimmi iluatsinngitsoortareersimaqimmata. taamaattumik ilinniartitsisut suliassamik isumaginnissinnaassagunik immikkut ilinniarsimasuusariaqarput.

Aammali atuarfimmi suliniartoqartariaqarpoq. Atuartut misilitsissutinik pigineqartunik misiliinikkut atuarniarnikkut ineriartornerat ilinniartitsisunit qanimut malinnaaffigineqassaaq. Atuartut angusaat tunuliaqutaralugit atuartut atuarsinnaanerannik allassinnaanerannillu ineriartortitsinissaq aalajangersimalluinnartumik anguniarlugu atuartitsinissaq aaqqissuunneqassaaq. Ilinniartitsisup 1. klassimiilli atuartup ineriartornera malinnaaffigissavaa suliniarnerlu aalajangersarlugu, atuartut tamarmik atuarsinnaanngornissamut allassinnaanngornissamullu pitsaanerpaamik periarfissinniarlugit.

Tamatuma saniatigut sullissiveqarfinni inersimasut angerlarsimaffinilu angajoqqaat sapinngisamik siusissukkut meeqqanut oqaatsitigut atuakkatigullu misilittagaqartitsilernissaat inuiaqatigiinni nalinginnaasumik sammineqassaaq. Inersimasut meeqqanik oqaloqateqartassapput. Inersimasut meeqqat peqatigalugit oqaatsinik atuisassapput meeqqanillu atuffassisarlutik. Meeraaqqerivinni meeqqerivinnilu sulinermik aaqqissuussinikkut meeqqat atuarniarnermik atuartinneqalivinnissaat sioqqullugu pisariaqartinneqartunik atugassaqartinneqarnissaat anguniakkatut sulissutigineqassaaq. Meeqqat avatangiisini oqaatsinik atuffiuaallaanngitsuniittut atuarfimmi ajornakusoortitaqarnerpaasarnerat ilisimalluarneqarpoq.

§ 37 naapertorlugu siusinnerusukkut apeqqutinnut akissutitut allanneqarpoq inersimasunut atuarniarermik allanniarnermillu ajornakusoortitaqartunut suliniutit pillugit nunani avannarlermiut Nuummi ataatsimeersuarnissaannut Nunatsinnit aningaasanik qinnuteqartoqarlunilu aningaasaliisoqarsimasoq.

Ataatsimeersuarneq 22. aamma 23. marts Nuummi pisusaaq allassimasutut Nunatsinni inersimasunut atuarniarermik allanniarnermillu ajornakusoortitaqartunut neqeroorutini ineriartortitsinissamut aallarnisaatitut atorneqassaaq. Ataatsimeersuarnerup kingorna ataatsimeersuortoqaqqissaaq, tassani kalaallit peqataasut pineqartumi siunissami suliniarnissamut Naalakkersuisunut kaammattuusiussallutik. Kaammattuutit inersimasunut atuarniarermik allanniarnermillu ajornakusoortitaqartunut suliniutinik aallartitsinissamut Naalakkersuisut atornialersaarpaat.

Ikinngutinnersumik inuulluaqqusillunga

Mimi Karlsen